

Maila cotschna (5)

RAQUINT CUNTINUÀ
DA VIOLA CADRUVI

■ **Sur la fatscha da ses vischin sa filan nattas. Nattas finas precisas, sco tratg cun la maschina da cuser cun fil rosa cler. Ella n'è uschiglio nagina che guarda pitgiv, insumma betg.** Ma ella na po betg sa schliar. Las nattas finas. E lura savura el dad opium 1977. Il parfum da sia tatta. Puspè ils maletgs e las regurdientschas en ses chau. Ella stauscha davent ils patrats. Tgi è quest tip?

E lura turna el il chau. Sin la vart sa-nestra da sia fatscha cuntinueschan las nattas. Ussa ch'ella vesa l'entira fatscha craja ella da vesair in muster. Ina staila engravada en sia fatscha, sur la gauta vi va in pez engiu, in ensi sur l'ureglia, in sur il frunt, lura cuntinuescha il muster da tschella vart da la fatscha e finescha en in piz sin il mintun.

Spert guarda ella puspè sin il laptop davant ella. Il tren rampluna sur ils binaris cura ch'il maun da ses vischin cumpara puspè en sia vista. El mussa sin ses monitor. Gnervus prenda ella giu ses uregliers, plain sgarschur ch'il um vuless far ina scena perquai ch'ella ha guardà talmain sin sias nattas. Betg ch'ella na fiss en general betg per ina buna dispita publica, questa odor. E las nattas. «S'interesseschas per chauns?» dumonda el. Ella na sa betg sch'ella duess esser levgiada u enervada. Smalltalk. La chausa pli nunnecessaria e pli stentusa, anc avant la funcziun da telefonar dal smartphone. Tgi dovra da quellas chaussas? Ma bun, ella ha ina nauscha conscienza perquai ch'ella ha guardà sin sias nattas e respunda pia: «Na, jau fatsch la website per in allevatur.» «Momo», respunda el. Momo. Sco sia tatta. Pir ussa percorscha ella ch'el di-



scurra rumantsch cun ella. «Ès ti dal Grischnun?» dumonda ella e sa turpegia el medem mument per la tuppa dumonda. Danunder duess el uschiglio esser? El surri. El para da pensar il medem, ma respunda lura: «Na, mo mes geniturs.» Aha. Ella dat dal chau. Il curt discurs para dad esser a fin, ella less schon esser levgiada cura ch'il um sa drizza puspè ad ella: «Pudessas era far ina tala website per mai?»

Ella less schon revolver ils eglis, ma sa retegn gist anc. Ella enconuscha tals tips. Han il sentiment ch'ella possia far in pau lavur gratuita per els, bun martgà, perquai ch'ella para talmain giuvna u simpatica u perquai ch'ins as ha entupà sin talmain casuala moda. Empè d'ina risposta fitg maltschecca sa decida ella dentant per ina risposta mez-maltschecca: «Quai custa aber.» «Daners n'èn nagin problem.» Ussa revolve ella propi ils eglis. Tals blaguns ha ella fitg gugent. Ella sa volva puspè envers ses laptop. «Na propi», agiunta el. «Lura va toch tar ina fatschenta», di ella e vul puspè tschentar si ils uregliers. «Gliez na va betg», respunda el cun in surrir. «E pertge betg?» «Perquai ch'il cuntegn da questa pagina vegn probabel ad esser in pau delicat.»

Scrit sin mes telefonin/cuntinuaziun suonda